



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 8

N Korea indang Spy Satellite nung mitkar nungdakba kecha mali: Seoul

Manchester United-i Mason Mount alizükba sangdongogo



VOL. XX NO. 263 (ADOK 263) DIMAPUR YANGTEPNÜ (THURSDAY) CHITENI (JULY) 06, 2023 ₹ 5.00

## NHIDCL-i mang ayimer aser sasar ENPO den "tripartite agreement" ka nung sign süteptsü

**Dimapur, July 5, 2023 (TYO):** July 4, 2023 nü Nagaland nung lendong atalokba nung asürtem mang ayimer aser iba lendong atalokba atema sasar ta National Highways & Infrastructure Development Corporation Ltd. (NHIDCL)-i metetdaksü.

Onoki akokba tashi road safety measures maneni inyaka aruaka iba lendong atalokba atema kanga sasaa bilemer ta NHIDCL, Ministry of Road Transport & Highways, GoI-i sangdong ka nung metetdaksü.

Sensotem aser lenmang nung senzusenbongertem kümzüka ayutsübaji onok indang tongtipangtiba tebilemsü khuret lir. Iba lendong atalokba kuli metetsü aser iba tesem nung anentsüh aluba aser ali metetsü atema NHIDCL-i Technical Team ka yokogo, ta parnokisa ashi.

November 2016 nung BRO-i NHIDCL nem Dimapur-Kohima Road, NH-29 ya 4-lane Highway yanglutsü atema agütsü. Tang tashi nung Packages-182 anaprong mapa 99% inyakogo

aser mapa tila kar dak alaka tulubalen tembangogo ta NHIDCL-isa ashi.

Yashi lendong atalokba tesem ya "Pagala Pahar" stretch nung atalok. Iba tesem nung 2018-19 nung cutting mapa inyak aser nungkü nung vegetation yoka liasü, ta parnokisa metetdaksü.

Iba tesem nungsa 2019-20 nungi Coir mat with hydroseeding, rock netting with 3D Steel Mesh, Rock barriers, Rock Bolting aser Vetiver grass plantation amala Special Slope Protection maparen balala inyaka arur aser lendong atalokba tesem ya anenzüka malui akangakang liasü, ta NHIDCL-i ashi.

Yashi iba tesem nung ali tamo anenzüka aluba okdokba mapang lenmang nung garitem anendena liasü nungkü nungi lungtem longzüka alu. Iba lendong atalokli NHIDCL-i Machineries (JCB, loader) o nübo agi yaritep aser minute 15 tsüngda Ambulance arua yirurtem yaritepa liasü ta NHIDCL-isa sangdong nung metetdaksü.



Nagaland CM Neiphiu Rio-i anir deputy chief minister tem, Rajya Sabha MP, NLA Speaker aser cabinet minister tem Union Home Minister Amit Shah den külemi agiba noksa angur.

**Kohima, July 5, 2023 (Agencies):** Eastern Naga nungeri state balaka meshiba angateteptsü atema India sorkar, Eastern Nagaland People's Organization (ENPO) aser Nagaland sorkar tsüngda tripartite agreement ka nung sign süteptsü imlar.

Bodbarnü Chief minister Neiphiu Rio, deputy chief minister tem- Yanthungo Patton o TR Zeliang, Rajya Sabha MP Phangnon Konyak aser NLA Speaker Sharingain Longkumer nunger den cabinet minister temi Delhi nung Union Home Minister Amit Shah den ajurutepa liasü.

Centre-i Eastern Naga nunger nem Autonomous Council mesüra frontier Naga

territory jenjang agütsü aser iba ateam state sorkar den asüngdangteptsü ta Amit Shah-i senden nung ashiba osang Deputy CM Patton-i osangbener den lemsatep.

"Centre aser ENPO tsüngda olemtepa arudar aser kobi melii state sorkar den olemteptsü anogo ka shimtsü. Iba ya tripartite agreement ka asütsü" ta Y Patton-isa ashi.

Centre sorkari Frontier Naga Territory (FNT) tentetsü shidangogo aser iba nung legislative, executive, administration aser financial autonomy dena lir ta anogo ishika tejakdang ENPO-i osang metetdakja liasü.

FNT tentetba sülen küm 10 sülen Eastern Nagaland Region

nung alirtem taginüba atongba asadangtsü atema iba inyakyim meyipa reprangshitsü ta Centre-i ENPO dang ashi

Külem Naga nungeri telongjem aser ka ama dang alitsü aginüba ama ENPO-i Centre ajanga shidangba onük agizükogo.

ENPO-isa July 27, 2011 nü state sorkari Centre dang Eastern district tem atema autonomous council ka tentetsü shidangba magizüker.

"Onoki iba olemtep nung noktaka lir aser külem Naga nunger sarasadem aser temoatsü dena tarutsü nung asen Naga nunger azükarua aoba mapa nung asenok ajak kasasa shilem agia aotsü imlar" ta ENPO-isa metetdaksüogo.

## Chumoukedima & Jharnapani tsüngda lenmang tera lapoktsür

**Dimapur, July 5, 2023 (TYO):** Chumoukedima aser Jharnapani tsüngda National Highway nung yashi gari mesenzütsü tenokdangba agütsüba tera salatsüogo.

Public kümzüka ayutsü atema National Highway nung Chathe (Patkal) Bridge nungi Kukidolong - Jharnapani (Paglapahar) tashi gari tilatem mesenzütsü tenokdangba magiener aser yashi metetdaksüba ama tanga osang ka magütsü tashi 7 Mile Jn CMD - Shokhuvi - Pimla - Mhainamtsi

- Punglwa - Jharnapani - Medziphema leni senzütsü nenshir ta Commissioner of Police, Dimapur Kevithuto Sophie-i sangdong ka nung ashi.

Kohima (Valley/ Riverside) leni atudang National Highway indang Paglapahar tesem nung medical emergencies garitem aser khu abenba gari tulutem lenmang achijilen dang senzütsü. Ajsüka senzusenbongertemi iba tesem nung gari manentsü metetdaksür ta Kevithuto Sophie-isa ashi.

## Manipur nung bunker 4 raksatsü

**Imphal, July 5, 2023 (Agencies):** Manipur nung tesüiba ghonda 24 tsüngda telok balala tsüngda khatapba aser ozüng alema nisungtem adenshiba tatalokba kar liasü saka state ajungalen tensa tajungba liasü.

Tesüiba ghonda 24 tsüngda Manipur police aser central forces-i hills aser valley districts nung lendong ataloktsü akok ta bilemba tesemtem mita ao.

Tanü Imphal West aser Kangpokpi district tem tsüngda aliba Lwangshangoil/Phaileng nung mejangjaba nisungtemi injang khaloktsü saka central

forces-i tensa azüok.

July 5 nü Manipur police aser central security forces külem teloki Kangpokpi, Imphal West aser Churachandpur district tem nung bunker 4 tashi raksatsüogo.

Tang district tem nunga bunkers raksatsüba osang angazüker.

Külen, July 4 nikongdang Manipur police-i United National Liberation Front (UNLF) indang army chief apu. Pa ya colonel Ngagom Pamheiba (Kaki) ta jangjaogo aser Imphal East district kübok Bramahpur Nahabam Leikai nung alir.

## Changtongya-Longleng lenmang atema metetdaksür

**Dimapur, July 5, 2023 (TYO):** Changtongya-Longleng National Highway-702 nung anentsüh kanga aluba ajanga gari tulutem mesenzü atatsü metetdaksür ta Longleng Deputy Commissioner-i metetdaksüogo.

Gari tilatem anepdang 6:00 ako nungi nikongdang 6:00 ako tsüngda senzüdaksütsü aser nikongdang 6:00 nungi anepdang 6:00 ako tashi lenmang shibangtsü ta Deputy Commissioner-isa ashi.

## Dimapur nung Janjati Shiksha Samiti Nagaland sentong agi



Nagaland Governor La Ganesan-i Janjati Shiksha Samiti sentong nung o jembiba angur.

**Dimapur, July 5, 2023 (TYO):** July 5, 2023 nü Kevijau colony, Dimapur nung 5th Academic Assembly indang Janjati Shiksha Samiti ayongzüka agiogo.

Iba sentong ya "Main Role of Teachers for Successful Implementation of NEP-2020" omen nung ajemdaker agi aser Nagaland Governor La Ganesan-i tongti tesemdang ama shilem agia liasü.

"India sobaliba nung alemli mapang nungi tesayurtem aser shisatsü agütsürtem kanga akhümsübür. Tesayurtemi sayutetba lanurtem indang pungmang atalokba aser taküm

melenshidaksüba atema iba akhümsübu tulu agütsür" ta Governor Ganesan-i ashi.

"India indang educational system nung New National Education Policy 2023 ajanga temelenshi tulu bentsür arutsü ta tamang akar. Küm 34 tashi kasa system benshia aruba sülen July 19, 2020 nü asen education policy nung temelenshi aika süogo" ta paisa ashi.

NEP ajanga India nung education jenjang temabai atutsü. Sorkar mesüra policy yanglurtemi pei tajungtiba agi policy tajung yanglur saka rejutem aser tesayurtemi iba

mapaji shitak inyak nung dang takok angutsü. Shisaliok maparen ajak atema tesayurtem ya tongshitem ama lir, ta Governor-isa ashi.

Iba sentong nung 5th Academic Assembly indang Organiser Secretary Pankaj Sinha-i Kiphire nung küm aika school züngtor anenterem asoshi JSS Skills development activities inyaka aruba osang lemsatep.

Iba sentong nung kaketsür 10 nem Sona Devi Sethi Charitable Trust, Mahabir Sharma & Family, Abhijit Sahu aser Vinay Singh nungeri Scholarships agütsü.

### Dimapur nung DDOs aser Accounts Officers nem training agütsü



**Dimapur, Chiteni/July 05 (TYO):** Dimapur district kübok DDOs aser Accounts Officers nem TDS Registration aser Return Filling training ka "Taxpayers are the Backbone of Nation's Progress" omen nung ajemdaker July 5, 2023 nü Commissioner of State Taxes Training Hall, Dimapur nung agüja liasü.

Iba training nung shisalen sayur Orenponi Yanthan-i jembidang, TDS ya source nung tax ajemba lir aser ibai sorkar atema tax bendentsü sentong ka lir, ta ashi.

TDS agizüksü atema Central Government mesüra State Government indang Department mesüra Establishment asütsüla; Local Authority; Sorkari shimba nisung mesüra Governmental Agencies asütsüla, ta ashi.

Registration angütsü atema Checklist asoshi DDO mesüra temelaba agüja aliba ketdangür indang noksa ka nüngdaksü (noksa ya indanghisa Webcam ajanga agitetsü: electricity bill, telephone Bill, rent receipt amala tesem mesüra office indang land document, Class 2 mesüra temaba DSC Digital Signature certificate (mandatory for company) mesüra Adhaar nung ajemdaker e-signature mesüra EVC electronic verification code for Others alitsüla, ta lai metetdaksü.

Ano iba sentong nung shisalen sayur Assistant Commissioner of Taxes, Yanbeni Humtsoe-i Tax Clearance Certificate (TCC) Guidelines for DDOs indang jembidang, DDOs temi bill shia GST Component medeni TDS shilem ana agizüksüla aser iba

den sen agütsüba mapang taxable value shilem ana agizüksüla aser Form GSTR7 nung TDS file sür TDS shilem ana indang sen ya sen agütsür taruba ita anogo 10 majungdang inoktsütsüla aser shilem ana den GST component soita ayutsüla tax agütsüri TTC agütsüba sülen ang agütsütsüla, ta ashi.

Deductor atema mezüngbuba mapaji [www.gst.gov.in](http://www.gst.gov.in) nungi online registration angütsü ya lir, ta lai metetdaksü.

Iba training ya Department of State Taxes ajanga ayongzük, kong Y Mhathung Murry, Special Commissioner of State Taxes ajanga tarur pela agizükba aser iba training ayongzükba nükjidong rateta ashi aser Wochamo Odyuo, Additional Commissioner of State Taxes ajanga melepzüng o jembia liasü.

### Wokha Deputy Commissioner-i NH-2 yangluba semdang

**Dimapur, Chiteni/July 05 (TYO):** Tang teyangludak National Highway (NH-2, 72.4 Km to 83 Km) nung mapa shidak inyakdaksütsü aser ozüing alema lenmang agiba mesüra lenmang yangluba nung tetsükdaksü magütsükdaksütsü nükjidong Deputy Commissioner, Wokha, Ajit Kumar Ranjan, IAS den National Highway ktdangürte, SDO (C) aser Contractor temi July 3, 2023 nü iba lenmang semdanga liasü. Deputy Commissioner,

Wokha meina Superintendent of Police, Wokha, Aotula T. Imchen-a oa liasü.

Lenmang tajungtiba nung yangludaksütsü mechi National Highway ketdangür temi yaria District Administration aser Police temi taoba ita ka tsüingta 'eviction drive' inyaka National Highway-2 nung compensation agütsür alidak ali rakzükba agienja arur.

District Administration ajanga contractor aser National Highway ketdangür dang ROW nung tanaben kibur

akumba mesüra ali amshitsü yong sen agütsür aliba tanaben agiba metetra osang agüjang ta metetdaksü.

Deputy Commissioner ajanga contractor aser National Highway ketdangürtem dang temolung agüja mapa shidak inyaksü shia liasü.

Mapa ajak shidak inyaka aotsü mechi parnok dang Deputy Commissioner-i hopta shia parnoki inyakba osangtem District Administration nem agütsütsü tuyua liasü.

### Mopungchuket kaketshir nem seminar-cum-camp ayongzüksü



Ao Temulungtsür Telongjem Kohima ajanga Jubilee Memorial Centre, Kohima nung Mopungchuket Ait Laisher Telongjem asoshi ayongzükba seminar-cum-camp sentong nung ketdangür aser tateneritem tangokba noksa ka yangi angur.

**Dimapur, Chiteni/July 05 (TYO):** Ao Temulungtsür Telongjem Kohima (Mopungchuket women's union) ajanga "Shisalemsa Seminar" nung ajemdaker Mopungchuket Ait Laisher Telongjem atema aonung ka holistic seminar-cum-camp sentog July 3-4, 2023 nü Jubilee Memorial Centre, Kohima nung ayongzükba liasü. Iba seminar nung Life

Management, Human Relationship, Competitive Exam, Entrepreneurship aser Discovering God's Plan & Purpose onüktem nung jembia liasü.

Iba seminar nung shisalen sayur ya Dr. Imtinario, Jongshimanen, Sashiwapang Lanu, Neichute Doulo aser Alemsunep Jamir nungertem liasü.

Iba sentong nung Class 5 nungi post graduate tashi kaketshir tetsür 39 aser tebur 42 dena parnokji ano Class 5 nungi 9 aser Class 10 nungi post graduate tashi telok ana lemsar sentong agia liasü.

Iba sentong ayongba committee nung convenor Dr. M Temjen Longkumer, aser züngsem Meyimenla aser Zulutemjen liasü.

### Dimapur nung mejangjaba nisung tasü mang ana nguteta lir

**Dimapur, Chiteni/July 05 (TYO):** State Stadium, Dimapur nung nisung tasü mang ka nguteta lir ta July 4, 2023 anüngdang 12:15 ako meta West Police Station, Dimapur dangi telephone ajanga osang ka aru. Iba sülen police station nungi duty nung alirtem iba tasü mang aliba tesem bushia ao aser Youth Resource and Sports Old Boys Hostel, State Stadium, Dimapur anasa mejangjaba tetsür ka tasü laoa aliba ngutet, ta Dimapur Police sangdong ka ajanga ashi.

Iba nisung temang ya majitetsüsa kanga mejungi shisaa orr liasü. Ajisüaka lai sleeve top sentsü tamak, long pant sentsü tamak, underwear sentsü temerem, bra sentsü temerem aser slipper sentsü tanen aser mesüngtuameremer agia liasü, ta sangdong ajanga ashi.

Ozüing agi melaba maparen ajak tembanga inyakba sülen tasü mang ya PM examination/jangjatsü atema District Hospital Dimapur Morgue nung yua lir.

Kibur/kinunger/tembar temi Officer-in-Charge, Woment PS Dimapur den 7085055027

ajanga tongteprateptsü akok, ta sangdong ajanga ashi.

Ano July 4, 2023 nikongdang 4:30 ako meta Old NST, Dimapur nung nisung tasü mang ka lir, ta OC East PS, Dimapur dangi osang ka aru.

Osang angazükba sülen East Police Station nungi duty nung alirtem tasü mang aliba tesemi ao aser yangji NST Hotel indang stairs nung arishi küm 50 shi tain tebur (non-local) ka mener süa aliba ngutet, ta Dimapur Police ajanga ashi.

Tang tashinung iba nisung asüba dak sendakba nung temolung melemtetsüsa kecha majitet. Iba nisungba ya meshitsüyar ka liasü aser aya agi asü südi, ta ashi.

Ozüing agi melaba ama maparen ajak inyakba sülen yasü mang ya post-mortem examination atema District Hospital morgue nung yua lir.

Nisungba ya pant sentsü tanak, belt tanak, slipper cream sentsü agir liasü.

Kibur/kinunger/tembar temi Officer-in-Charge, East Police Station, Dimapur den 7085055020 ajanga tongteprateptsü akok, ta sangdong ajanga ashi.

### Mokokchung nung NSCN (U) züngsem ana temai adok



**Dimapur, Chiteni/July 05 (TYO):** Assam Rifles temi temolung agüja inyakba ajanga NSCN (U) züngsem ana temai adok aser 0.22 pistol ka aser injang ana bendanga agüja liasü, ta sangdong ka ajanga ashi.

NSCN (U) züngsem ana ya 2009 nungi kanga yakyaka liasü aser tashiyim amshia senotsü meshiba maparen nung dena liasü. Temai adoker nisung ana rongnung tetsür ka dena liasü, ta sangdong ajanga ashi.

### Nagaland Police-i ozüing nung aibelenertem apu

**Dimapur, Chiteni/July 05 (TYO):** Hopta ana nung khen mapa tamajung inyaker apuba osang agütsüba nung June 15 - 30, 2023 tsüingta Nagaland Police ajanga mapa tamajung inyaker aika apuba shia lir.

Nagaland Police sangdong ka ajanga ashiba agi, Arms Act kübok Dimapur nung ken o asem züluokogo aser nisung pongu pua lir, kechiaser parnoki ozüing nung aibelena prangbong bena liasü.

Ketdangür temi .32 pistol ana den magazine aser .32 injang 12 ngutet. Iba den külemi 7.62 pistol ka den magazine ka aser injang tenet pua liasü.

Ano .22 pistol ana den magazine nguteta liasü.

"War on Drugs" nung temolung agüja temesepba mozü amshiba ajemdaksüba nunga terenlok lia kasa mapang Narcotic Drugs and Psychotropic Substances

(NDPS) Act kübok Dimapur, Mokokchung, Wokha, Zunheboto, Phek aser Longleng nung ketdangür temi ken o toku benoka opium nungi agizüka yangluba brown sugar gram 553.65 nguteta liasü, ta sangdong ajanga ashi.

Iba mapang SP Caps tablets 400 aser Codeine unit 15 ngutet. Item NDPS ken o nung nisung 17 pua liasü.

Kasa mapang tashiyim amshia senotsü meshiba ken o trok benoka liasü. Iba mapang ketdangür temi sen 1500 den NSCN/GPRN tenüing aliba Non-Local ID nguteta liasü. Dimapur, Kohima aser Mon nung tashiyim amshia senotsü meshiba dak sendakba nung nisung 17 pua lir aser item rongnung NSCN-K den sendaktepa alirtem aser civilian pezü lir, ta sangdong ajanga ashi.

# AIMPLB-i UCC anema Law Commission nem tezüluba ka agütsü

**New Delhi, July 05 (Agencies):** Bodhbarnü All India Muslim Personal Law Board (AIMPLB)-i Uniform Civil Code (UCC) anema Law Commission of India nem tezüluba ka nung telangzüba agütsüogo; tezüluba nungji UCC anema onük kar metetdakja lir aser linük temzüng kübok agüja aliba temeden balala metetdakja lir.

AIMPLB working committee-i UCC dak sendakba nung telangzüba 'draft' ji agizükba sülen Law Commission ket nung agütsü.

Tamalen Law Commission of India Secretary-i AIMPLB dang UCC dak sendakba nung

tebilemba/telangzüba agüjang, ta metetdakja liasü.

AIMPLB secretary general-i, UCC atema o lemtepogo aser tatemsa UCC ya menüngdak mesüra taginüba masü ta bangjemogo, ta metetdaksü.

Committee-isa tamangba yimsü dak sendakba organization balala, nija aser lokti lenirtemi tim telangzüba renema agütsüsü atema ita trok agütsüsüla, ta mepishi.

Tamalen AIMPLB-i executive senden nung bangzüng ka renema, Uniform Civil Code (UCC) ya tamakoktsü, kechiyong iba ya menüngdakba ozüng ka asütsü, ta sangdonga liasü.



July 05, 2023 nü Mumbai nung NCP senden jakdang Sharad Pawar-i aniba NCP pusemertem Y B Chavan Centre nung adenshir yimyim ayimba noksa nung angur. Sharad Pawar-i aniba NCP aser Ajit Pawar-i aniba NCP telok naprongla senden balala ayongzüka menogo.

# PM-i state 4 nung sen cr. 50,000 indang project tenzüktsütsü

**New Delhi, July 05 (Agencies):** Hokolbar aser Honibarnü Ato kilonser, Narendra Modi-i Uttar Pradesh, Chhattisgarh, Telangana aser Rajasthan state tem semdangba mapang nung sen crore 50,000 indang project 50 tenzüktsütsü.

Sangküm Lok Sabha election agitsü lia Centre nung BJP-i aniba sorkari taruba ita 8-9 tsüngda terenlok project tasen aika tenzüktsütsü, talisa taruba ita ishika tsüngda assembly elections agitsü aliba state tem nung project aika tembanga semzüktsütsü sentong lir.

Hombarnü Modi leniba nung amenba senden nung sangküm February-March nung sen 7.6 lakh crore jenjang project 560 semzüksü aser state balala nung sen 5.6 lakh crore jenjang project 350 atema lung azüngtsütsü, ta metetdakja liasü.

Iba project rongnung signature projects 60-65 shi lir aser item ama tongtibang project shia nungji sen crore 5,000 shi indoktsü. Item projects rongnung Chenab apu, Pamban Railway apu, Sone apu, Dwarka Expressway, Delhi-Mumbai Expressway kübok Ankleshwar-Baroda lenmang aser Gorakhpur-Haryana Anu Vidyut Pariyojna lir.

Ato kilonseri item signature project ana- Amritsar-Jamnagar Expressway aser Pandit Deen Dayal Upadhyay Junction nungi Son Nagar tashi freight corridor semzüktsütsü.

Osang angazükba agi, project 200 bo renemer semzüksüba dang lir aser ano project 200 taküm küm tatembanglen tashi nungbo renemtsü.

Hokolbarnü Modi mezüng Raipur-i aoba sülen project kar atema lung azüngtsütsü aser project kar semzüktsütsü, iba sülen lokti senden ka nung adentsü.

Iba sülen pai Gorakhpur semdanga Gita Press nung sentong ka nung adenba sülen Vande Bharat train asem tenzüktsütsü. Paisa Gorakhpur railway station yanglushitsü atema lung azüngtsütsü.

Ato kilonseri Uttar Pradesh kübok Varanasi semdanga yangji project kar atema lung azüngtsüba den project kar semzüktsütsü, item rongnung Varanasi-Jaunpur section four lane densema lir.

Honibarnü pai Telangana kübok Warangal semdangtsü aser project balala atema lung azüngtsüba sülen Rajasthan kübok Bikaner semdangtsü.

# Ansari tepsetba ken o nung aibelenertem küm 10 tepuokdak ayutsü

**New Delhi, July 05 (Agencies):** 2019 küm lokti kati Tabrez Ansari tepsetba ken o nung aibelener nisung 10 prongla küm 10 tepuokdak ayutsü obendang agütsüogo.

Bodhbarnü court kati Indian Penal Code (IPC) kübok Arlla 304 nung ajemdaker parnok nem temerenshi obendang agütsü.

Jharkhand nung aliba Seraikela court-isa aibelenertem dang senchi 15,000 achi.

June 27, 2023 nü court-i iba ken o nung nisung 10 aitsüba

sülen Public prosecutor, Ashok Kumar Rai-i, temerenshi obendangji July 5 nü agütsüsü, ta metetdakja liasü.

Iba ken o nungsa tai tonglokja alir, Kushal Mahali bo ken o angadanga aruba mapang süadok aser tai tonglokja alir anabo kuli tejangja manguba agi chiok, ya Rai-i metetdaksü.

Ansari tepsetba ken o nung aitsür nisung terji - Bhim Singh Munda, Kamal Mahato, Madan Nayak, Atul Mahali, Sunamo Pradhan, Vikram Mandal,

Chamu Nayak, Prem Chand Mahali aser Mahesh Mahali nunger lir.

2019 küm June 17 nü Jharkhand nung Seraikela kübok Dhatkidih yimdak lokti jagi, Ansari-i motorbike auyatsü merang ta tai tonglokja insang agi züka liasü.

Ansari ya Pune nung aayanger aser merang rongteper ka liasü, saka pa par kidang Eid benjung amongtsü atema Dhatkidih yimdaki oa aliba mapang nung zükset.

# MP nung nisung kati tribal ka dak natzü naloktsüba sülen police-i puogo

**Bhopal, July 05 (Agencies):** Madhya Pradesh nung nisung kati tribal aayanger ka dak natzü naloktsüba sülen Mongolbar aonung police-i aibelensangji puogo.

Pravesh Shukla-i tribal lanur aayanger ka dak natzü naloktsü; National Security Act (NSA) kübok pa nem temerenshi tulu agütsüsü. State administration-isa Shukla'er ki shilem kar bendoktsüogo, kechiyong pai ozüng alema ali rakzüka ki asü, ta osang ka ajanga metetdaksü.

Shukla-i nisung ka dak natzü naloktsüba video ka Mongolbarnü social media nung prokshiba sülen police-i pa anema ken o benoka liasü. Bodhbarnü ketdangsertem aser police-i JCB amshia Pravesh Shukla'er ki shilem kar bendoktsüogo.

Madhya Pradesh Chief

Minister, Shivraj Singh Chouhan indang office-i twitter ajanga, "Pa anema NSA benokogo, bulldozer amshia ki bendoktsüogo aser nüngdakra aibelenertemji ali telung süklep (10) nung remtsüsü. Madhya Pradesh nungbo tamajung inyaksü bilema alirtemi ozüng alema meinyakdang tamasa 10 ben bilemdangtsüla," ta metetdaksü.

Madhya Pradesh nung BJP-i iba tatalokba bushisingdangtsü atema nisung teri akümba committee ka tentetogo, ta MP BJP Tir V D Sharma-i metetdaksü.

State nung opposition Congress-i iba tatalokba bushisingdangtsü atema CBI

nem agütsüsüla aser aibelensanger ki bendoktsüsüla, ta takhangba agütsü.

Bahujan Samaj Party (BSP) Tir, Mayawati-ia iba tatalokba ya taaktsüka lir, ta shia tai tonglokja alisanger kiji bendoktsüsüla, ta takhangba agütsü.

Osangbener den jembidang state Home Minister aser sorkar otongdar, Narottam Mishra-i, "Bulldozer amshia ki bendoktsübaji Congress-i ahangba agi masü saka ozüng alema ali atsünga agiba agi bendoktsüba lir, ta metetdaksü.

Congress party-i, natzü naloktsüsangji BJP den tesendaktep lir ta aitsür, ajisiüka BJP-ibo aibelensangji party den sendaktepa mali, ta shiogo.



July 05, 2023 nü New Delhi nung Congress Tir, Mallikarjun Kharge Leadership Development Mission (LDM) workshop nung adentsü arudang pa agizükba noksa nung angur. Iba workshop ya Schedule Castes aser Schedule Tribes atema wazüka aliba mendentem nung party tashi itshitsü nükjidong nung ayongzük.

**Government of India**  
**Ministry of Women & Child Development**  
**SANGDONGER**

PRADHAN MANTRI RASHTRIYA BAL PURASKAR, 2024 atema National Awards Portal (<https://awards.gov.in>) nung application agizük tenzükogo, ta nüburtem dang sangdonger. Item awards ji Tasüaitba, Saisapong, Lokti tenzükba mapa, Science & Technology, Environment, Arts & Culture aser Innovation atema agütsüsü, item ya national level nung tetushi agütsüsü temsüa alirtem atema lir.

India senso aser India nung alir tanurtem, aser (application/nomination agizükba tatembangbuba anogo tashi nung) arrshi küm 18 tema masürtemi iba award atema tenüng agütsüsü akok.

PMRBP atema application ji iba award atema yangluba online portal <https://awards.gov.in> nung ang agizüktsü. Online application form agizüktsü atema tatembangbuba anogoji 31.08.2023 lir. Osang tejangja National Awards Portal (<https://awards.gov.in>) nung lapoka repringtsü akok.

**(Vikas Tripathi)**  
 Under Secretary to the Govt. of India  
 Ph. (office) : 011-23388506

CBC 46101/11/0001/2324



## TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 06, 2023

### Asenok zübara !

**M**apa ajak nung asenok ya tangar India nung amato masü onsara zübara, asenok engineer-temang tezúbaba aser nübortemang tezúbaba, gari lenmang shitak meyangluyonga kecha masü aser gari lenmang shitak meyangluba agi asü-ama aser yiruyipong lendong atalokyonga kecha masü, asen tia majung dang ta mapa shitak meinyakba agi asenok timtem, takoksa aser lendong ajuruba ajak tia nem tongloksür. Tanü tashi asenok yamaji 'okora' kümer zübazüba aliyonga India kübok alir asünungji, India government sentong nung aliba terenlok mapa inyaktsüba sentongtem agibo asenoka atonger. Anungji, Nagaland nung National aser State highway ajak ak rü amai kümer alibatema, lenmang kar 2 lane aser kar 4 lane ta yanglu tenzüker. Aji oda, kar renemogo aser ano aika merenem ajokshidagi aser ano karbo tangang tenzüker. Item lenmangtemji DPR nung aliba ama masü saka lenmang yanglurtemi mulungba nung dang pei inyaknüsü inyakdaksüba agi lenmang kar renemli raksar aser kibur mali ama kümadoker, karbo kodanga merenemer ano karbo lenmang yanglutsür asü raksatsüar meshiteti gari mesenzütet ajuzütsüsa inyaker. Iba jagi tesem aika nung lenmang teinyakdak nung senzusenponger (public) aika timtem takoksa aser lendong ajuruba asenoki angashia aser ngua alitsü. Aji oda, asenok zübazülemertem asoshi tan asütsüsa atalokba lendong tulutibaji yakanü Dimapur aser Kohima na tsungda National Highway nung atalokba ya asütsü. Atangji, asen lima ya tenem lima, anungji tenem len nungi anentsü alutsü aser longren longpang nungi long mezüa alutsübaji kecha meteta maka, anungji item ajakji lenmang yanglurtem kisung dang atongtsülaa masü. Ajisüaka, yakanü Dimapur-Kohima lenmang nung tsunglu aruba mapang tenem len nungi long tulu mezüa alua gari asem tashi dak onloksüba lendong nung nisung asüba aser yiruba lendong ajuruba nungji tebilemdangtsü aser tangazüksü tongtibang lesson keta lir. Yimya agi longren longpang aser long tulu alidak lenmang lapokyonga aodang temelaba agir bomb (dynamites) amshia pokdoker. Ajisüaka, bomb amshia lenmang lapokyonga aoba nungji tekümdangtsü kar lir, kechiyong tenemtsung nung tenemtsung kolak tashi atashia bomb apokba jagi tema nung aliba longtemji dang poksar masü saka tenük agi manguba telonglen tenem amendaka aliba longtem dena anakshia poksatsür aser tashimait kümdaktsür. Anungji, tang ama tzungluruwa mapang item longtem amendaka alibatemi tashimait küma longzüka alur. Yakanü Dimapur-Kohima lenmang nung atalokba lendongjia lenmang yanglur company-temi tenem kolak ajak anakshia bomb poka lenmang yangluba agi atalok südi ta temulung melemi bilemer. Item ama lendongji mataloktsü atema lenmang yanglurtemi lenmang lenkalen litembangji indangindang metsungdang saka anentsü nungzüka malutsüsa 'slope' süa tua yanglur. Ano, ali tanük nungzüka alutsüsa alidakbo ai aser süngdonglidonga tema toktsür aser longren alidakbo long mezüa alununga shitaktsüsa yinzü agi zütsük amai yanglua toktsür. Aji oda, lenmang teyangludak nunga senzusenponger gari moutettsüsa lenmang nung lishi, auyi aser tarok tapa meyutsür. Iba amaji meinyakba ajanga süisüponger kar dak danga lendong atalokra, itemji lenmang yanglurtem khuret lir. Item ama lenmang yangluba nung nübortem lendongi maitsüsa tang lenmang teyangludak Dimapur-Kohima, Mokochung- Wokha, Amguri- Mokochung aser Changtongya -Longleng lenmangtem ama nunga inyaktsüsa asenok 'okora' kümer zübazüba malitsüla. Kechiba lenmang renemer kibur mali ama toktsür ? Kechiba lenmang merenemdangyongi lenmang raksar aser anenzüka aoer ? Kechiba lenmang teyangludak nung nisungtem mejajatettsüsa lishi aiteta toktsür ? Kechiba lenmang teyangludak nung tarok tapa ajak nembanga meinyaker ? Kechiba tenem kolaklen aliba long dena mezüa alua nisung onsetsüsa inyaker ? Item ya asenoki government aser lenmang yanglurtem dang asungdanga telangzüba bushitetra teti asenok lenmang tajung nung jajatsü aser tia-a tajung asütsü.

## OLEMSABANG

### ANO GO MAPANG TELEMSA TENÜNG

~ T. Meren Paul, Lower PR Hill, Kohima

Asen otsüla obola nung Anütezütsü/Anütetsü (time piece/wrist watch) ji kechidang ajar ar memetet liasü anungji anogo ka nung 24 hours (Ghonda 24) amshia maru saka jembishinü dang anepdang, anüngdang, nikongdang aser aonung ta tongmelang agi jembi saka libaliro mapa inyakdangbo anogo mapang takzúbaji Anü adoklih nungi Anü alu tashi anüng nung Anü jenjang kong ali ibaji repranger mapang tadakzük tenüng palala jateta amshi. Aonung mapang telemsah jia mapa agi benteta mapangji lemsa aser yamaji tenüng jatettsüh. AROK OSEP, SHILEM ANA nung Anogo ka nung mapang telemsa ta ser mapang telemsa 11 Ao aser English nung agüja lir saka Anütetsü mapang anasatiba ji shia mangur anungji ni angazükba telemsa ajak agi 20 yamai atongsemtsür.

- Ankongpang- mapang 1:00 baji shi nungi An makong tashi.
- Mezüng Ankong 1:30 baji shi.
- Tanaben Ankong 2:00 baji shi
- Tasemben Ankong 3:00 baji shi.
- Sangwapang (dawning)- 3:30 baji shi.  
(baji shi ta amshir kechiyong anütetsü repranger an akonger masü)
- Züngyia/Kibarere- 4:00 baji shi
- Anütsüng ayang- Anü merema adoktsü tenzüka.
- Anepong- Anü temerem agi peranga adokba mapang (Sunrise).
- Anepdang- 5-7 baji mapang chiyongkiyonger alu mapai aoer.
- Toroto- 9-10 AM, ajak alu mapai oseper, azüngapong mapang.
- Masangyong- 11:00 Alu mapa nung mayongtsü chia süngo ajemba mapang.
- Anjongmeshi- Anüngdang chiyongba mapang 1:00 baji.
- Anjongmanga 2:30 baji
- Akpoar Meshi- 3:30 – 4:30 baji
- Anüaer- (Sunset) 5 baji, Anütaor ta ajar,
- Nikongtsütsü- 5:30 baji shi nungi Nikongdang chiyongkiyong mapang.
- Tsükisen- Aonung 7-8 baji (pm) tsükiseni aoba mapang.
- Kishirep 9-10 PM, Ajakprongla mejangtsü ki shibangba mapang.
- Yiprep/Mejangrep 10-11 baji yimer ajak mejangadokba.
- Aiyaterm/Poklem (midnight) 11-12 baji nisung shinga mesenzüba mapang.  
(AROK OSEP nung zülua aliba amah mapangji baji ta amshir, baji ya meyi Anü mapang atishir, Tsüngkum Anü denbo meputeptsü. Laishiba nung ah An-i asemben akongba indang shia angur)

Otsüla Obola nung alu wadang nung mesüra kisü jensü mapa ajak nung Anü repranger mapang dakzü dakponga aru. Anüdok tenemtsung nung alu ayimerdemi Anü mangazüka or Anü mungoaka Anü akum yaloktsüba dakzüer nikongtsütsü kidangi apusoa dokotsü mapang shidak dakzüteta ki bushi.

Ano lenten medong asahdangba rangdong (measuring scale/tape) kecha atakteta maka asüh saka telatet tasahzük karh amshi, edem tenüngdem yamai jateta amshi.

- Am Ka- tepen tachichi tabelen anaprongla indangindanga songtoker temeyong tahlangba talak tachichi nungi tabilen tashi asahzükba dang am ka ta ajar. Saka am ji ajak kasa masür, karh tera tahlangba aser karh tera tatsüba asütsü. Tasahzüksang aso yari asüer, full both arm span.
- Tokochima- Am ka tesahdang, toko teyong nungi temeyong talak tashi tasahzük. One arm span.
- Süklep- Tekütsüla nungi temeyong talak tashi tsahzük, one cubit
- Akah ka- temeyong jemtsüba talak nungi temeyong ka talak tashi, thumb and a finger span.
- Kahtsüba- Akah tahtsüba, jemtsüba aser tuyuba temeyong na songlaba. Thumb and the index finger short span.
- Kahlangba- Akah talangba, jemtsüba o teyongba na temeyong songlaba. Thumb and the middle finger long span.
- Tekaboalem- tekabo salaer lemdakba tasahzük, one hand breadth.
- Yongsemlem- Temeyong asem lemdaka ayuba tasahzük, three fingers breadth.
- Yongnalelem- Temeyong ana lemdakba tasahzük, two finger breadth.
- Temeyonglem- Temeyonga ka lemdakba tasahzük, one finger breadth.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

### Nicaragua nung putir, Rolando Álvarez tepuokdak nungi chiokogo



Nicaragua nung police-i Khristan putir, Rolando Álvarez apudang tangokba noksa nung angur.

**July 05, 2023:** Taküm küm tetenzüklen Nicaragua nung ketdangsertemi Khristan putir ka pua tepuokdak ayu; pai linük anema inyak, ta aija küm 26 tepuokdak ayutsü obendang agüja liasü saka tawa pa tepuokdak nungi chiokogo.

Matagalpa nungi putir, Rolando Álvarez "La Modelo" jail nungi anizükogo saka kobi melii linük nungi meindoka tanga linüki yoktsüa akok.

Álvarez chioktsü atema kanga merang inyaker, Bianca Jagger-i twitter ajanga, "Pa 'La Modelo' jail nungi anizükogo, ajisüaka sorkari ketdangsertemi pa Rome-i yoktsüa akok, ta kü nem osang metetdaksüo," ta lemsatep.

Osang angazükba agi, Álvarez-i linük toktsür aotsü memelungra pa maneni tepuokdak puoktsü aser küm 26 tashi tepuokdak ayutsü.

Taküm February ita nung sorkar ketdangsertemi Álvarez densema yimtenren aser yimsü dak sendakba nung tepuokdak alir nisung 222 United States-i yoktsü merang, ajisüaka paibo tayimtsü jagi matu.

Pai linük security anema inyak aser social media ajanga osangtsüsang tai prok, iba denjji külemi sorkar ketdangser ka official mapa inyakdang timtem agütsü; pai ketdangsertem tashi manga aser ketdangsertem mezüngmeshi, ta pa nem tai

tonglokja liasü.

Tamalen Bianca Jagger Human Rights Foundation tentetla aser Tir, Jagger-i, Álvarez taküm lir ta kuli agüjang ta akhangba den külemi pa semdangtsü atema temelaba meshia liasü.

Lai mepishiba ama Nicaragua sorkari Álvarez'er kibong züngsemtemi pa jail nung semdangba mapang tangokba kuli noksa Jagger nem agüja liasü.

Kijai tashi amshir, Ortega yimsüsüba kübok yimtenren nung tanemertem anema inyaker, osangbenertem nem temeden magütsür aser Arogo anema inyakba kanga bulua kümogo.

### Islam yimsü dangi meyiptsü melungba agi Khristan amitsür ka tepset



Shazia Imran Masih

**July 05, 2023:** Lahore, Pakistan nung Muslim nunger pezüi Khristan amitsür kati Islam yimsü agizüktsü memelungba agi la puer oa tashiyim amshia taküm raksatsüba sülen tepset.

Taoba ita Muslim nunger pezü jagi arrshi küm 40, Shazia Masih tashiyim amshia raksatsüba sülen la tekong nung arang aser acid inokja liasü, ta lar adianu kati ashi.

Iba ken o nung tongti aibeleneri aibelenba nangzükogo, ta police-i metetdaksü.

Küm ka tejaklen Shazia Imran Masih kinüngbu-a tepseta liasü saka tang tashi par kibongi ochi temeden mangur, ta

lar adianu Zafar Masih-i metetdaksü.

Shazia Masih kinüngba asüba sülen la Lahore University of Management Sciences nung aliba day care center ka nung inyaka liasü. Taküm June 6 nü la mapai ao saka kidangi meshilangi liasü, ta Zafar Masih-i ashi.

La tepsetba ken o nung tongti aibelener, Noman Gujjar (Mani taka ajar) kiyong nungji nisung kanga tamajunger ka lir. Noman-i Masih dang Islam yimsü agizükang aser pa den kibong kümang ta aiben asüngdanga liasü.

"Shazia-i tsüsuba agi ibaji onok den melemsatapi liasü, ajisüaka la puer aoba anogo

matongdang lai kinünger ka dangbo, Gujjar-i akhangbaji mataloktsüra la tepsettsü ta la amokmeren, ta lemsatapa liasü," ta Zafar Masih-i ashi.

Evangelical Arogo nung züngsem, Zafar Masih-i, post mortem report ajanga la tashiyim amshia taküm raksatsüba sülen ang tepsetba jangjaogo, ta metetdaksü.

Police-i Gujjar puogo aser pai-a la tepsetba nangzükogo, ajisüaka police-i tanüngba nisung asemji aputsü atema kecha meinyaker, ta Zafar Masih-i metetdaksü.

Tanüngba nisung asemji Gujjar'er adianu ka aser par kinünger ana lir.

"Tang tai tonglokja alirtemji tashi tulu aliba nisungtem lir, anungji parnoki onok dang iba ken o agienang ta shia onok amokmerener. Parnoki amokmerenba ajanga onok atsüker aser iba ken o atema sademsadema meinyakteter. Gujjar tang tashi police ket nung lir, saka ozü aianu atema onoki ochi temeden mangutsüa akok, kechiyong police-i tanüngba aibelener asembo mapur," ta paisa metetdaksü.

"Ochi temeden atema teimla samaogo anungji onoki Arogo lenirtem aser sorkar ketdangsertem dang onok nem ochi temeden den security agüjang ta mepishir," ta paisa metetdaksü.

### ANOGO ABEN TSÜNGREM DEN

#### Tatsü saka tarok

#### T.ken 117:1-2

Tenüngsang Ken 117 ji tatsütiba ken lir-tekong ana dang lir. "O Kibuba sangang, nenok bendangertem ajak; nisung ajaki Pa ayima sangang. Kechiyong asen tsütsü Pa yimlibilem tulu lir; aser Kibuba atangjibaji teti tatem maka lir. Nenoki Kibuba sangang!" Ibai tatsü saka tarok lir.

Tangari asenok dang kechi inyak ibaji kecha timtem melii asenoki bushiteter. Kari asenok asoshi inyaktsüba nung asenoki kanga pelar ta ashir. Saka kkenkhen asenoki Kibubai asenok asoshi inyakba nung, talisa mapa tila nung Pa dang kanga pelar ta ashitsü mebilemtetter. Tenüki ngudaktsüba, tenarongi angashidaktsüba atema asenoki Pa tenüng asanger asü masü? Pa temoatsütem metetta Pa tenüng sangang.

Ken züluri ashir, "Nisung ajaki, Pa ayima sangang." Saka iba lima nisung billion aikati Pa tenüng masanger kechiaser parnoki Pa memetet. Parnoki kodanga Yisuji alima Kümtetdakba ta mashir. Tia maka, Khristan aikati iba indang mebilemer. Kin ajaki mamangra koda sür kin ajaki Pa tenüng asangtsü ?

Kibuba sangang kechiyong Pa yimlibilem taochi aser ochiba teti alir. Aser nai shiba tenüng asanger Pa indang ajak dang ashitsü merangang.

Tsüngrem tenüng asangtsü asoshi Pai ne nem moatsüba kar bilemdangang. Pa temoatsü teti asoshi agütsü ta bilemstü temela aser Pai moatsübatem mengui toktsür. Nai tenüng sangaka, Pa tenüng masangba aika lir. Tanü Khristaji Kümtetdakba lir ta memeteter ka dang ashitsü Kibuba dang asüngdangang.

### China nung ketdangsertemi pastor kibong ka dang senchi 400,000 achir



Pastor, Yang Xibo'er kibong

**July 05, 2023:** China nung ketdangsertemi Xiamen nung house church tulutiba, Xunsiding Church nung Pastor, Yang Xibo aser pa kinüngtsü Wang Xiaofei na dang senchi yuan sen 400,000 (dollar sen 55,000) shi achir.

US nung amenoka aliba ChinaAid teloki China nung Khristantem reshikangshiba osangtem bendener aser tepuokdak aliba Khristantem yarir.

Tamalen-a pastor Yang aser kinüngtsü na dang senchi achibaji tenati magütsütsü, ta shia 2021 küm nungi tenati raraa arudar.

Tenati social media ajanga "Tsüngrem atema küna nem-a timtetm tilaka agütsüba atema Pa dang pelar. Court-i tuyuba ama senchi agütsütsüsa iba lima nungbo onok ket nung rongsen mali, aser ibaji Tsüngrem taochi

ajanga lir," ta metetdaksü. 2019 küm May 19 nü Xunsiding Church nokdanga liasü aser senchi yuan sen 25,000 achi. Sorkari anogo 30 tashi iba Tenla ki meketa nokdaker tenük yoktsü atema police yoka liasü.

Iba sülen nungi Arogoi tesem balala nung tekülem sentong agi. Ajisüaka ketdangsertemi maneni mita oa Khristantem tekülem sentong agibaji nokdang.

Taküm February ita nung ChinaAid-i report ka ajanga, China nung Chinese Communist Party (CCP)-i Arogo aser Khristantem ano taliba reshikangshi tenzükogo, house church pastor tem aser lenirtemi ashikülak mapatem inyaker ta tai tongloktsür aser Arogo nem tenla agütsüba den ter-shilem agütsübaji ozüing alema lir ta shia nokdang, ta metetdakja liasü.

AO OSHI ANGAZÜKDAK: TANÜ ANGAZÜKTSÜBA OJANG



Remtep

(v) amentep, ka madak ka amenloka ayu (pile up)
\* Tanurtemi peisasa pei auso shitoker remtepa ayu.

Remzük

(v) sentsü arem, jetzüka ao (fade away)
\* Ozü kima naro nem tzü magütsüba agi yakta remzüka ao.

OLONG PAITEP # 6567

Grid for Olong Paitep # 6567 with numbers 1-16 in various cells.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü alu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. \_\_\_ adenshi - (4)
14. Tsünüsenbongtsü adokdak - (3)

OLONG PAITEP # 6566 TELANGZÜBA

TIPIEN :

- 2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.



ALOKBAR KIBONG WARA TESASHI AGI ATONGER :

Alokba o Warakla na jala Washiben, küm pezü, wara tesashiba agi tonger temezünger tesashila dangi sarasademdaktsüi anir ao. (Sarasadema sülen)

Temezünger : Oh, kecha shisabulua teli, ya Tsüngremer sentong lir.

Pai jangja jangjaa sayuogo, anogo pezünü lir jala ya anir aotsü, iba sülen anogo ternü lir külen jala tetsü anir aotsü, anogo terpungu nü buba nung jala Tebu anizüker aotsüji Kibubai tejangja sayuogo, anungji nenok ajak pei tanüla renemshiba mapang dang südakjangma.
Sarasademer ashiba ama jala to anogo pezünü lir asü, iba sülen anogo ternü lir külen jala tetsü Warakla asü. Alokba to tesüngmangtsüka lumia, sarasadema lir külen anogo terpungu buba nüji par kidangsür Sobangba asü.

Alokba rataseta süngmangseter!

~ Lilir : WhatsApp

Manipur nung village defence volunteers-i sentong ayongzüka agi



Imphal, July 5, 2023

(Agencies): July 5 nü Churachandpur district nung village defence volunteers ajanga sentong tulu ka ayongzüka agiogo.

Iba sentong nung village defence volunteers 2,000 jungnüa Churachandpur district nung adenshi aser parnok den public dena rally agi.

Tan hopta tetenzüklen

Langza nung nisung ka kanga mejungi tepsetba anema iba sentong ayongzüka.

Manipur nung security forces-i village defence bunkers agientsü mapa tenzüka anogo nung village defence volunteers-i iba sentong ayonga agiogo.

Kasa anogo Manipur sorkari July 10 tashi internet services shibangba mapang atsülangba

metetdaksüogo. Olulu aser video, noksa o osangtem belenshiba ajanga law & order nung kongshitsü akok ta bilemba agi sorkari tenokdangba atsülangba ashi.

Manipur Director General of Police (DGP)-i ozüng alema inyaksangshiba, mi senoktsüba aser khatapba osangtem sangoktsüba sülen state sorkari iba lemtet agi.

Tripura nung TMC aser Congress lennir 10-i BJP nung aden

Agartala, July 5, 2023

(Agencies): Lok Sabha election jakdang Tripura nung Congress aser Trinamool Congress lennir tejen 10 tashi BJP nung denogo.

July 5 nü Congress General Secretary Prasanta Bhattacharya aser taoba state Trinamool Congress President Asish Lal Singh na dena nisung 10 BJP nung aden.

"Tripura nung Congress party tashi mait kümogo aser taoba Assembly election nung parnok CPIM den tesentaktep yangluba ajanga iba kuli agütsür" ta Tripura Food and Civil Supplies Minister Sushanta Chowdhury-i ashi.

"Mapang ka Sukhomoy Sengupta aser Radhika Ranjan Gupta nung amala lennirtemi CPIM anema rara aser nisung aikati bendanga agüja inyakba ajanga Congress amenok.

Ajisüaka tanü Tripura nung Congress-i CPIM den tesentaktep yangluogo aser nübertemi parnok magizüker" ta Chowdhury-isa ashi.

"Prime Minister Narendra Modi-i terenlok mapa inyakba ajanga Tripura nungeri kümük anaben atema sorkar kümmdaktsüogo. Nisung aikati Congress aser CPIM yaritepba magizüker anungji onoki parnok dang BJP yaritsü ayongzüka" ta paisa ashi.

Tanü BJP state President Rajib Bhattacharya tsüngdang General Secretary Amit Rakhsit, taoba TMC state president Asish Lal Singh, General Secretary & TMC Assembly Election candidate Koheli Das, TMC Secretary Krishankanta Debnath, Biswanath Ghosh, aser Swpanidip Chakraborty nung BJP züngsem aküm. Congress party nungi General

Secretary & Spokesperson Prasanta Bhattacharya, Sudharsan Majumder, Sadar District Secretary Rajib Das, Asish Deb aser CITU state committee member Surajit Bhattacharya nungeri BJP nung aden.

"Ni Congress atema anibelega inyaka aruogo saka tanü party CPIM dak metaloka lir. Congress dak tashi mali aser tarutsü nükla kecha mali. Onoki Congress aser CPIM tsüngda tesentaktep magizük saka iba ya lennir ka nija ajangzüksü atema inyakba mapa ka lir" ta Prasanta Bhattacharya-i ashi.

Taoba Tripura CM Sachindra Lal Singh'er jabaso Asish Lal Singh-ia Bengal Chief Minister Mamata Banerjee aitsü.

Mamata-i Tripura nung TMC lennirtem aser züngsemtem senzüka yutsür, ta pai ashi.

Assam nung "Trouble Engine" government lir: APCC President

Guwahati, July 5, 2023

(Agencies): Assam nung tang "double engine government" masü saka "trouble engine government" ka ajurua lir, ta Assam Congress President Bhupen Bora-i Dhubri nung ashi.

BJP sorkari nübertem yaritsü melena khuret ang teimba adokdaksür, ta pai ashi.

Lok Sabha election anogo tonga arudang Dhubri nung

political party balala nungi lennirtem adenshia nüboyimteper.

"BJP-i Badruddin Ajmal dak metaloka lir aser iba ya intensive care unit nung shirangertemi oxygen dak metalokba ama lir. Nisung kari Ajmal ya BJP indang agent ka ama bilemer" ta Bhupen Bora-isa ashi.

Himanta Biswa Sarma-i aniba sorkari tawa tu sen aika

apuogo aser ano sen talika apura sorkar mapa inyakerem nem itasen agütsüba nung timtem ajurutsü aser Orunodoi scheme amala tongtipang schemes meinyaktetsü, ta paisa metetdaksü.

State sorkari constituency re-election mapa shitak meinyaker. BJP-i Gogoi tsübur ta MP Pradyut Bordoloi-ia metetdaksü.



July 04, 2023 nü Ao Senden Kilem, Conference hall nung Ao tesayurtem jatepa Ao Oshi zülumen jangjashiyim sentong agiogo. Iba sentong nung lensayur Wt. Dr Lanurenla, FAC. Mkg aser Wb. I. Temjen Tzüdir Iiasü. Ao Senden Tir Wb. Chubawati Longchari tajungshi jembi. Iba sentong Dr. L. Temjen Jamiri ketdang asü aser Mrs. Temsülat tatem sarasadema iba sentong shibang.



Japan sorkari Fukushima nuclear power plant nung aliba 'treaded radioactive' tzu tzüyim nung inoktsütsü telemtetba agiba anema Seoul, South Korea nung nüburtemi Japan Ato Kilonser Fumio Kishida (achichi) aser South Korea Tir Yoon Suk Yeol indang mask agir longkak aitba noksa nung angur.

<b>LAND FOR SALE</b>	<b>NAGA UNITED VILLAGE</b>
	Near Daily Bazar Dry Land - Price - Rs. 380/- per Sq.ft. Contact - 9612448446 / 8798119488

### N Korea indang Spy Satellite nung mitkar nungdakba kecha mali: Seoul



**Seoul, Chiteni/July 5 (Agencies):** North Korea indang mezüngbuba spy satellite nung mitkar nungdakba kecha mali, ta South Korea-i Bodhbarnü metetdaksü. Iba satellite teraksa asadangba sülen parnoki iba osang lemsatapa liasü.

May ita North Korea-i parnok indang mezüngbuba military reconnaissance satellite orbit-i yoktsü merandang, ajisüaka satellite abenba rocket ya khaketa yokba sülen mapang tatsüka dang lir tzüyim nung tsüka liasü.

Iba rocket tsükokba sülen South Korea-i naval rescue ships, minesweepers aser tzu telungi airtem anisemer anogo 36 tashi inyaksangshia liasü.

Rocket aser satellite teraksa kar agitetba sülen South Korea aser United States nung mongintemi asadanga liasü, ta Seoul nung defence ministry-i inyakyim tembangba sülen Bodhbarnü metetdaksü.

Parnoki asadangba sülen reconnaissance satellite ka ama iba satellite nung military utility kecha mali, ta ministry-i ashi.

North Korea-i ashiba agi, parnok temeket nung US military tali renlokyonga aoba

liromedema kümdaktsütsü atema iba spy satellite yanglutsü nungdaka liasü.

North Korea lenir Kim Jong Un-i military spy satellite yanglutsüba ya ajak dang tongtibangtiba mapa ka kümdaktsü.

Kasa mapang nung Pyongyang-i ano takaratiba nung satellite ya yoktsü tenangzükba agütsüogo.

North Korea indang ruling party-i iba rocket tsükokba ya ketdangsürtem dak tai tongloktsüogo, ta state media sangdong ka ajanga metetdaksü.

North Korea-i May 31 nü satellite yokba ya United States, South Korea, aser Japan-i aitsüogo, kechiyong United Nations bangzüng ajanga NK nem ballistic missile technology mamshitsü atema tenokdangba agütsür lir.

Korea linük ana tsüngda tang tesendaktep kanga mejungi kümer lir aser denuclearisation atema sensaksema bangdaker lir.

Kim-i, North Korea ya nuclear power ka ta sangdongogo aser tactical nuclear weapons tem densema hadir balala tali yanglutsü asoshi ayongzükogo.

### Jenin amakba sülen Israel-i Gaza nung bomb pokloktsü

**Jerusalem, Chiteni/July 5 (Agencies):** Israel dak rocket khaloktsüba sülen Israel-i fighter jets amshi Gaza Strip nung nung bomb pokloktsüogo. West Bank nung Jenin amakba sülen tang Gaza Strip nung nung bomb pokloktsüogo.

Bodhbarnü Israel-i Gaza Strip amakba mapang ali telung nung aliba prangbong hadir yangludak facility ka raksaja liasü. Iba facility ya Hamas meyong lir, shirnoki iba strip amokbanger lir. Ajisüaka nisung taküm samaba osangbo kecha mali.

Israel-i parnoki Gaza Strip nungi Israel anüoletip leni khaketa yokba rocket pongu tashi khadangogo ta ashiba sülen Gaza nung bomb poklokja liasü.

Kasa mapang nung Israel

army-i Bodhbarnü ashiba agi, anogo ana tashi ali aser anüng ajanga Jenin amakba sülen sepaitem iba tesem nungi atsünginogo. Iba tesem amakba mapang nisung 12 tepset aser nisung 100 shi yirua liasü.

Jenin refugee camp nung alir shirnok jena aotsüsa aküm parnok Bodhbarnübo kidangi meyipa arua tensa asadangogo. Palestinian Red Crescent Society-i ashiba agi, parnoki camp nungi kibong 500 shi anina liasü kong nisung 3000 shi densema lir.

Israel nunger sepaitem atsünginba sülen West Bank nung Palestine nunger meyirejang aika kanga pelatepa liasü.

Jenin refugee camp nung Palestine nunger meyirejang

aika jenoka lir, aser item nisungtem ya 1948 küm Israel kümtetba mapang jentokba nisungtem nungi jakzükbatem lir.

Israel-i ashiba agi, telungpurtem samatsütsü atema parnoki Jenin maka liasü, ajisüaka teyari agütsüba telok balalai ashiba agi, parnoki arishi küm balala nüburtem aika anepalüogo.

Iba camp amakba sülen Iran, Egypt, Jordan aser Arab League densema linük aser lokti tentet aikati Israel aitsüogo.

UN Secretary-General Antonio Guterres-ia jenin amakba ya kanga süoki ia agiba lemsatapogo aser iba ya sensaksemtü atema Hokolbarnü senden ka ayongzüka amentsü ta ashi.

### US, NATO teyari medeni Russia litsü nung memaktettsü: Moscow

**Moscow, Chiteni/July 05 (Agencies):** US aser NATO teyari medeni Russian litsü nung Ukraine nungeri drone amshia memaktettsü ta Moscow-i ashi, koba Russia yimtiba anasa Mongulbarnü drones pongu khazüka yokba osang angazükba sülen ashi.

Russia-i linük anüdoklen Kharkiv region nung aliba Pervomaisky amakdang tanur 12 densema nisung 43 yiru, ta Ukraine-ia ashi.

Ukraine-i drone amshia amaktsüsa West-i yarir ta Moscow-i ashi, aser taoba mapanga iba ama teyari agütsüba ya kiralongrar mapa ta aija liasü.

"US aser par NATO allies temi Kyiv nem teyari magütsüibo yamai memaktettsü. West-i drone operator nem training agüja liasü aser iba ama mapa tamajung inyaksü asoshi nungdakba itdangiter osang agütsür," ta Russian foreign

ministry ajanga ashi. Kremlin aser Ukraine den arütsüa aliba Russia nunger jila tem densema tawa drone amshia makyonga aruba rongnung ibai tasenba alitsü, koba Moscow-i Kyiv tenüng asener.

Russian mitkar temi ashiba agi, parnoki drone ponguprong khazüka yok aser anepdang amakba nung asü-ama mesüra ki o jen raksaba mali.

Drone ka Vnukovo international airport nungi mile 25 shi pilar Kubinka nung khazüka yok aser mapang tatsüka air traffic nung timtem ajurua liasü, ta emergency services ajanga sorkar meyong RIA Novosti news agency dang ashi.

May ita tetenzüklen Kremlin nung drone ana khazüka yok aser mapang tatsüka lir kasa ita drones temi Moscow nung ki talang yanglua alidak amak.

Russia-i Iranian "Shahed" attack drones 22 aser missile asem Sumy, Donetsk aser

Zaporizhzhia region tem nung khaloktsü, ta Kyiv-i Mongulbarnep shia liasü.

Par sepaitemi item drones 16 bo samatsü, ta ashi.

Russia den arütsüa aliba Ukraine anüdoklen Kharkiv region nung amakdang nisung 28,000 shi aliba Pervomaisky jila nung nisung aliba ki kima gari anena ayudak kongshi.

Kyiv nung tir indang office nung tekolakba Andriy Yermak-i gari rongdoker aser raksar aliba noksa tem lemsatapa liasü.

Kharkiv region indang governor Oleg Synegebov-i iba lendong atalokba tesem nung tangokba video ka social media nung prokshiba nung Soviet mapang yangluba housing block anasa gari arongba nungi mokozi adoka liasü.

Tanur 12 densema nisung 43 yiru, ta pai ashi.

Linük south tsütsü Kherson yimti nung Russia nungeri injang-bomb tulu khaloktsüba mapang nisung ana yiru, ta

ketdangsür temi sangdong.

Moscow-i amokbanga aliba Zaporizhzhia nuclear power plant nung rara mesütsü sentong lir, ta Ukraine-i Mongulbar aonung aitsü aser Russia-ia Kyiv-i iba tesem amaktsü sentong lir ta shia liasü.

Rara tenzükba sülen linük ana yagi mapang shia kati ka dak tai tongloktsür aser iba plant ya lendong nung yutsür.

Reactor asem buba aser pezü buba indang kilem temalen 'explosive devices' mesükba oset tem yua lir, ta Kyiv-i ashir, koba Europe nung nuclear power plant tulutiba lir.

Itemji poksaba ajanga power unit tem meraksatsü saka Ukraine tsütsü nungi injang-bomb khaloktsüba ama angutsü aser Moscow-i osang tiazü prokshitsü, ta ashi.

Moscow nung Russia indang Rosatom nuclear agency advisor Renat Karchaa-i state television dang ashiba agi, "July 5 nü ammag nung Ukraine

army temi Zaporizhzhia nuclear power plant amaktsü merangtsü."

Ukraine-i "high-precision, long-range weapons" aser drones amshitsü sentong lir, ta pai ashi.

Chechnya nung sempet anguba Russian investigative journalist dak prangbong bena alirtemi züka merenshi aser mozü kidangi anir ao, ta la indang osang kaket aser rights group kati ashi.

Ajaki kanga junga meteta aliba osangbener Elena Milashina aser okatsür Alexander Nemov na airport nungi arudang iba lendong ya Mongulbarnep ajuru.

Mongulbarnü Kyiv kübok St Michael's cathedral nung Ukraine nunger kaket zülur Victoria Amelina atema asüpila sentong nung nisung 200 shi dena liasü, shiba Ukraine anüdoklen restaurant ka nung Russia nungeri amakdang yirua liasü.

## PSG-i Coach Christophe Galtier mapa nungi anentsüogo



**Chiteni/July 5, 2023**

**(Agencies):** Tenangzüktepba yanglur aliba raksatsü asoshi mapang talangka sensak asemba sülen Paris Saint-Germain aser coach Christophe Galtier na pilaogo. Galtier-i taoba küm Mauricio Pochettino melen aser tenangzüktepba yangluba nung küm ka anunga liasü. Ajisüaka taoba Ligue 1 season tembangba sülen June ita tetenzüklen pai club toktsütsü ta imla liasü.

Arishi küm 56 tain coach lenisüba nung PSG-i ano taoba season Ligue 1 title benogo, ajisüaka imlaba ama masayatet, kechiyong PSG pur Champions League nung maneni kanga kara tsüka liasü.

Taoba mapang Nice nung inyakba mapang asayar kar mezüngmeshiba atema pa France nung okadak nokdaksü lia tang pai PSG toktsür. Iba ken o nung pai aibelenba ngutetra pa küm asem tashi tepuokdaki yoktsü akok. Muslim nunger anema jembishinüba aser racism dak sendakba nung Galtier aser par jabaso John Valovic-Galtier na dang ken o ashishiogo.

Club sangdong ka ajanga, "Galtier-i bendanga agüja inyakba aser pa professionalism atema tenüngsang agütsür aser iba ajanga Rouge et Bleu puri otsüsütsüsa French Championship title 11benbuba benogo aser Trophée des Champions ka kokogo," ta ashi.

Galtier-i club toktsüba ajanga taoba Barcelona aser Spain manager Luis Enrique officially shimtsü atema PSG nem maongka agütsüogo, shiba küm 12 tsüngda PSG coach tibuba asütsü.

2022 World Cup tnung amakok ngua Span national team toktsüba sülen arishi küm 53 tain Spain nunger coach ya tanaben coach mapa inyaksü asoshi meyipa arutsü.

Barcelona coach asüba mapang Enrique-i mezüngbuba season nung UEFA Champions League, La Liga aser Copa Del Rey koka liasü. 2017 küm club metoktsü tsüngda pa lenisüba nung club-i ano La Liga title ka aser Cope Del Reys ana tashi koka liasü.

## Manchester United-i Mason Mount alizükba sangdongogo



**Chiteni/July 5, 2023**

**(Agencies):** Manchester United-i Chelsea nungi England midfielder Mason Mount alizükba officially sangdongogo. Hopta ishika sensaksemba sülen team anaprongla tangatettep ka dangi aruogo aser iba ajanga Mount ya tang transfer window nung Manchester United-i alizükba mezüngbuba asayar kümogo.

Mount ya arishi küm 6 asüba mapang Chelsea nung aden aser parnok academy nung asaya liasü. Pai Chelsea nungi 279 ben asayaogo aser iba mapang goal 58 idaksü aser

assist 53 süja liasü. Chelsea nungi asayaba mapang pai 2020-21 season nung Champions League kokogo.

2020/21 aser 2021/22 season nung pa nem Chelsea's Player of the Year naroküm agüja liasü.

Chelsea nung taoba season pai junga masayatet aser league asaya 24 nung pai goal asem idaksü aser assist ana dang süja liasü, kechiyong pa yiruba ajanga junga masayateti aruogo.

England nunger midfielder yagi pa Manchester United nung adenba indang

lemsatepogo aser ashiba agi, Erik Ten Hag kübok club tasenba nung takok maroktem akoktsü yongya atar.

"Na intetba club toktsütsü temela masü, saka kü career nung Manchester United nung taruba jenjang agitsü jangrademtsüka asütsü. Ni parnok den toktepdangogo anungji ni squad tashi tait ka nung adener ta meteta lir aser takok marok angutsü jangraba telok ka nung adentsü yongya atar," ta pai ashi.

"Erik ten Hag kübok club-i jenjang tulu agiba ajaki ngudar. Manager den ajurutepa pa sentongtem sensak asemba sülen ni season tasenba atema yongya atar aser imlaba ama meranga inyaksü renema lir," ta pai shisem.

Nüngtugu osangbener Fabrizio Romano-i ashiba agi, Manchester United aser Chelsea nati Mongolbarnü pound million 55 den ano million pongu bendenloktsü atema mulungtepogo.

Manchester United-i ashiba agi, Mount den pa club nungi 2028 küm tashi asayatsü atema tenangzüktepba yangluogo aser ano iba den küm ka atsülangtsü atema lenmang sadema lapoka yuogo.

## BWF Rankings: PV Sindhu 15bubai asepzüka luogo

**Chiteni/July 5, 2023**

**(Agencies):** India tsürtem rongnungi nüngtugu badminton asayar PV Sindhu tawa junga masayateti aruba sülen Mongolbarnü sayaba BWF World rankings nung la jenjang asem asepzüka lua 15buba nung lir.

Sindhu, shiba taküm küm April ita top 10 nungi tuguatok lai asayamung 13 nung point 51,070 dang nguteta lir.

Arishi küm 27 asayar ya taküm küm junga masayateti arudar aser iba den ano la yiruba ajanga tetsükdaksü adokdaksüogo.

Taoba küm August ita Commonwealth Games nung gold medal anguba sülen la tetsüng yiruba ajanga ita pongu tashi masayai lir meyipa arur asaya, ajisüaka tang tashijunga masayateti arudar.

Lai taküm Madrid Spain Masters Super 300 nung dang final tonga asayatet aser Malaysia Masters Super 500 nung semifinal tonga asayaogo. Iba asayamung ana dak alia la

tanungba asayamungtem nung kanga kara tsüka liasü.

Kasa mapang nung tebur tarep asaya nung Satwiksairaj Rankireddy aser Chirag Shetty na India nunger tebur tareptem rongnungi temaba jenjang nung lir aser tena tang jenjang 3buba nung lir.

India nunger tarep yagi küm ka ana kanga junga asaya aruda aser tenati taoba küm India team-i Thomas Cup akokba nunga teyari tulu agüja liasü.

Tebur kija asaya nung India nunger rongnungi HS Prannoy temaba jenjang nung lir. Pa tang 8buba nung lir aser pa sülen Lakshya Sen 19buba aser Kidambi Srikanth 20buba nung lir.

Tetsür tarep asayar Treasa Jolly aser Gayatri Gopichand nata jenjang ka asepzüka lua tang 17buba nung lir aser tebur tarep asayar MR Arjun aser Dhruv Kapila na 26buba nung lir.

Tarep temeyoktep asayar Rohan Kapoor aser N Sikki Reddy na tang jenjang 33buba nung lir.

## Chief selector asütsü Ajit Agarkar shimogo



liasü," ta kasa sangdong ajanga metetdaksü.

BCCI sangdong ajanga ashiba agi, CAC-isa, seniority (number of Test matches played) dak ajemdaker men's selection committee mendenbuba mapa abentsü atema Agarkar tenüng agüja liasü.

Taoba Mumbai captain Agarkar-i India tenüng nungi Test 26 aser ODI 191 asayar lir. Pa 2007 ICC World T20 asayamung akokba team nung densema liasü. Senior selection committee nung tanga züngsemtem rongnung Subroto Banerjee, Salil Ankola, Sridharan Sharath aser Shiv Sundar Das nunger densema lir.

Osang ajanga ashiba agi, chief selector indang itasen koba küm ka nung crore ka lir iba ya ajungkettsütsü tenangzükba agüja BCCI ketdangsurtemi Agarkar den tongtepratepa liasü. Committee nung tanga züngsemtem nem küm nung sen lakh 90 agütsür.

Iba sülen Agarkar-i iba mapa asoshi apply asütsü telemtetba agi aser nüngtugu nisungtem rongnung pa dang liasü. Iba mapa agizüktsü atema pai Mongolbarnü IPL team Delhi Capitals assistant coach mapa toktsüogo. Temetetsü kaji 2020 küm Agarkar-i iba mapa atema apply asüba mapang BCCI-i magizük.

**Chiteni/July 5, 2023**

**(Agencies):** Board of Control for Cricket in India (BCCI)-i Senior Men's Selection Committee mendenbuba asütsü Ajit Agarkar shimogo.

BCCI-i sangdong ka ajanga ashiba agi, Cricket Advisory Committee (CAC) nung Sulakshana Naik, Ashok Malhotra aser Jatin Paranjape nungeri men's selection committee nung selector mapa atema Agarkar tenüng agüja liasü.

February ita Chetan Sharma mapa nungi anentsüba sülen chief selector mapa ya taziung liasü. Sharma-i iba mapa bener aliba mapang mepetmesü aika adoka liasü, kong Hardik Pandya-i par ki mapang shia semdangba indang densema liasü.

"Züngsem asem agi kumtetba CAC-i, iba mapa atema Ajit Agarkar tenüng agüja

### **BILEMDANGANG**

**"Nai koma meranga inyaker yamaji nü jenjang tajungba akümer."**